

續  
文  
獻  
通  
考

續文獻通考卷之七十三

皇明進士雲間王圻纂

節義考 節婦一

周

陶嬰魯門女少寡魯人將求焉嬰乃作黃鵠歌以自明終身不改

母師魯九子之寡母臘月休作從幼子歸視父母與諸婦孺子期夕而返歸太早止閭外期盡而入穆公聞之賜號母師使夫人諸姬皆師之

伯姬宋共公夫人魯宣公之女歸于宋十年共公卒伯姬寡居偶宋宮災左右曰火將至矣伯姬曰婦人之義保

傳不俱夜不下堂頃之左右又曰夫人蓋少避伯姬曰  
越義而生不如守義而死遂遠于火而死

蔡人妻宋人之女既嫁于蔡而夫有惡疾其母將改嫁之  
女曰夫之不幸即妾之不幸也柰何去之適人之道一  
與之醮終身不改夫茆茲之草雖甚臭惡猶始于將采  
之終于懷擷之浸以益親況于夫婦之道乎彼無大故  
又不道妾何以得去終不聽

鮑女宗宋人鮑蘇妻養姑甚謹蘇仕魯三年而娶外妻甚  
寵厚女宗如謂曰可以去矣夫人既有所好又何留乎  
女宗曰婦人以專一爲貞以善從爲順豈有專夫室之  
愛爲賢哉吾如不教吾以居室之禮而反欲使我爲見

棄之行將安所用遂不聽事姑愈謹宋公聞之求其廬  
號曰女宗

楚伯嬴秦穆公之女楚平王之夫人昭王之母也吳師入  
郢闔閭盡妻其後宮次至伯嬴伯嬴持刀拒之曰妾聞  
生而辱不若死而榮吳王慙遂退舍伯嬴閉永巷之門  
三旬不釋兵秦敕至昭王乃復國

貞姜齊侯之女楚昭王之夫人也王出遊畱夫人漸臺之  
上而去王聞江水大至使使迎夫人忘持其符使者至  
夫人曰王與宮人約召宮人必以符今使者不持其符  
不敢從及還取符則水至臺崩夫人沉水而死王曰嗟  
夫守義守節不爲苟生處約持信以成其貞乃謚曰貞

姜

貞姬楚白公勝之妻白公死其妻結纁不嫁吳王以重幣聘焉白妻辭之曰忠臣不借人以力貞女不假人以色豈獨事生若此于死者亦然妾不能從夫死今可更嫁乎卒拒不行

魯潔婦秋胡子妻也納之五日而去官于陳五年乃歸未至家見路旁婦人採桑秋胡子悅之下車謂曰力田不如逢豐年採桑不如見貴郎吾有金願與夫人婦人曰吾不顧金所顧卿無有外意妾亦無滯佚之志收子之齋與笥金秋胡子遂去至家奉金遺母使人喚婦至乃嚮採桑者秋胡子慙婦曰子束髮辭親往仕五年乃還

當馳驟揚塵疾至今乃悅路旁婦而犂之金是忘母也  
是污行也遂投河而死

韓憑妻宋人宋王悅其色築高臺而窺之旣而殺憑欲以  
爲夫人憑妻歌曰燕雀卑棲不樂鳳凰妾是庶人不樂  
宋王遂自縊而死宋王怒令遠夫墓葬之不得合壙後  
二墓上常有鴛鴦飛相往來

梁高行梁之寡婦色婉而性淑夫早逝梁貴人多欲娶之  
不能得梁王聞之遣使聘焉高行曰妾夫不幸死妾爲  
養其幼孤貴人多求妾者幸免今又辱王命妾聞婦人  
之義一醮不改以全貞信之節今志主趨生是不信也  
貴而忘賤是不貞也棄義從利無以爲人乃援鏡持刀

以割其鼻曰王之求妾以色也今妾刑矣何以事王使  
還報王重其義復其身號曰高行

共姜衛世子共伯之妻共伯早死共姜守節父母欲奪而  
嫁之不許作栢舟之詩以自誓

杞梁殖妻齊人也莊公襲莒殖戰而死莊公歸遇其妻于  
路使吊之辭曰有先人之敝廬在下妾不得與郊吊莊  
公乃還詣其室成禮妻無子內外無五屬之親乃枕其  
夫之屍于城下而哭城爲之崩旣葬夫赴淄水而死

代趙夫人者趙簡子之女襄子之姊代王之夫人也襄子  
誘代王使厨人以斗擊殺之而迎其姊姊曰吾聞婦人  
執義無二吾豈有二夫哉欲迎殺何之遂呼天磨笄自

死今人因呼爲磨笄山

秦 羅敷邯鄲女子爲千乘王仁妻仁後爲趙王家令羅敷出采桑陌上趙王登臺見而悅之置酒欲奪之羅敷善彈箏作陌上桑詞三解以自明不從

漢

桓嫫涿郡劉長卿之妻桓鸞之女也生一男五歲而長卿卒妻速嫌疑不肯歸寧兒年十五夭歿妻慮不免乃豫刑其耳以自誓涿相王吉上奏高行題其門閭號曰行義桓嫫縣邑有祀必膳焉

王莽女爲孝平皇后孝平崩莽移漢號其女爲黃皇室主欲更嫁之令立國將軍孫建世子豫將醫往問疾后大



怒因稱廢疾不肯起葬遂不敢殯及漢兵誅莽后曰何面目見漢家自投于火而死

禮宗者安定皇甫規妻也不知何氏女規初喪室家後更娶之及規卒時猶盛而容色美輦車爲相國聘以輜輶百乘馬二十疋奴婢錢帛充路氏乃輕服詣卓門跪自陳請辭甚酸愴卓使傳奴侍者悉拔刀圍之而謂曰孤之威教欲令四海風靡何有不行于一婦人乎氏知不免乃立罵卓卓乃引車庭中以其頭懸轆轤朴交下氏謂持杖者曰何不重乎速盡爲惠遂死車下後人圖畫號曰禮宗

趙萬妻宕渠人名娥避黃巾寇走萬足疾不能行娥扶之

行萬爲賊所殺賊欲污娥以刃迫之娥聳身將刀貫心達背而死

樂羊子妻河南人羊子嘗遊學七年不返妻常躬勤養姑兼餽羊子後盜有欲犯者先劫其姑妻操刀而出盜曰釋汝刀從我者可全汝姑不從則殺妻仰天而嘆舉刀刎頸而死盜亦不殺其姑太守聞之即捕殺盜而以禮葬之號曰貞義

唐姬漢廢帝弘農王妃靈帝崩子辯襲位董卓令李儒進酖王謂姬曰卿王者妃勢不復爲吏民妾幸自愛遂飲酖死姬時年十八歸潁川父會稽太守瑁欲嫁之姬誓不許及李摧破長安得姬欲妻之固不聽尚書賈詡知

之白獻帝帝感愴迎置園中使使持節拜爲弘農王妃  
陰瑜妻荀氏名采頴川人英之女明敏有才藝年十九而  
瑜卒無子同郡郭英喪偶英以采許之因詐病召采旣  
不得已而歸懷刃自誓英命侍婢奪其刃女旣至郭氏  
乃僞爲懽悅之色因勅令左右辦浴旣入室揜戶以粉  
書扉曰尸還陰氏遂自縊

魏 夏侯令女爲曹爽從弟文叔妻早寡無子父文寧欲  
嫁之令女以刀截兩耳自誓居常依爽爽誅其家上書  
絕婚強迎以歸復將嫁之令女竊入寢室引刀自斷其  
鼻其家驚惋謂之曰夫家夷滅已盡守此欲何爲令女  
曰仁者不以盛衰改節義者不以存亡易心司馬懿聞

而賢之聽使乞子自養爲曹氏後

吳許昇妻呂氏字榮由拳人許昇少爲博徒無操行榮  
勤業養姑數勸許昇修學有不善輒流涕進規榮父疾  
許昇呼榮改嫁榮終不肯歸許昇感激自勵遂以成名  
昇被辟命行至壽春爲盜所害刺史尹耀捕得之榮乃  
手斷其頭祭許昇巨族多欲聘之榮誓不再嫁黃巾之  
亂賊欲污榮義不以身受辱賊遂殺之是日疾風暴雨  
雷電晦暝

焦仲卿妻劉氏仲卿爲廬江小吏妻爲姑所逐自誓不嫁  
其家逼之乃投水死

公孫達妻卻氏李公謀妻戴氏遭寇欲劫與俱行二婦罵

晉不絕口遂被害

孫奇妻范氏名姬歸奇一年奇亡父母以其無子迎還其家姬不往迎者迫之姬乃截耳與鼻曰父母迎我者以我色能事人也今殘廢人矣行將何爲迎者乃返

王氏女平度州人女家貧從夫秦友築未毛城累糧以從夫亡乞棺葬之剖心以殉時人哀之爲起祠

顧承妻張氏兄溫以承爲孫權所囚奪張改嫁丁氏張飲藥死

張白妻陸氏績之女名勝生年十三適白白罹家禍因遷徙異郡遂誓不嫁姚信表之

晉 綵珠石崇妾也姓梁氏孫秀得寵于趙王倫使人求

之崇出諸妾美麗者使任所取使者曰奉命求綠珠他人無與也崇曰綠珠吾所愛不敢奉命使者乃返後秀族滅崇家崇謂綠珠曰吾爲汝受禍汝將如何綠珠曰妾終不負君乃自墜樓而死

辛氏狄道人嫁散騎常侍梁緯西都陌締爲劉曜所害辛有殊色曜將妻之辛撫地大哭曰女不再醮乞就死曜曰貞婦也任所之乃自經死以禮葬之

愍懷太子妃王氏太尉衍之女也字惠風太子旣廢居於金墉衍請絕婚惠風號哭而歸行路爲之流涕及劉曜陷洛陽以惠風賜其將喬屬屬將妻之惠風拔劍拒屬曰吾太尉女皇太子妃義不爲逆胡所辱屬遂害之

嚴憲京兆人杜有道妻年十八而寡誓不改節撫教孤子植及女譚後植果顯女亦有淑德

賈渾妻宗氏渾爲介休令被劉淵將喬晞攻破死之宗氏有姿色晞欲納之宗氏罵曰屠奴豈有害人之夫而欲加無禮於其妻於爾安乎何不促殺我因仰天大哭晞遂害之時年二十餘

許延妻杜氏延爲益州別駕爲李驥所害驥欲納杜氏爲妻杜氏號哭守夫尸罵驥曰汝輩逆賊無道死有先後寧當久活我杜家女豈爲賊妻也驥怒遂害之

皮京妻龍氏字憐狄道縣人年十三適京未逾年而京卒京二弟亦相次隕旣無胤嗣又無期功之親憐貨其嫁

時資裝躬自紡績數年間三喪俱舉葬殮既畢每時享祭無闕州里聞其賢屢有聘者憐誓不改醮守節窮居五十餘載而卒

北凉 楊氏呂纂之妻弘農人美豔有義烈纂爲呂超所殺遂欲妻之謂其父桓曰后若自殺禍即及宗桓告楊氏氏曰大人賣女圖富貴一之已甚其可再乎乃自殺張氏秦安呂紹妻年二十紹死便請爲尼呂隆見而悅之欲穢其行張遂升樓自投于地二脛俱折而死

張天錫妾閻氏薛氏咸有寵天錫疾謂曰汝二人何以報我吾死後豈可爲人妻乎皆曰尊若不諱妾請效死供洒掃地下誓無他志及疾篤二妾皆自刎天錫疾瘳追



悼之以夫人禮葬焉

北秦 符登妻毛氏壯勇善騎射登爲姚萇所襲遂欲納之毛氏罵曰吾天子后豈爲賊羌所辱何不速殺我因仰天大哭曰姚萇無道殺天子今又欲辱皇后皇天后土寧不鑒照萇怒殺之

南燕 段豐妻慕容氏德之女德既僭位署爲平原公主年十四適於豐豐爲人所譖被殺將改適僞壽光公餘熾慕容氏謂侍婢曰我聞貞女不事二夫今主上不顧禮義嫁我若不從則違嚴君之命矣於是尅日交禮僞辭以疾熾不之逼三日還第沐浴置酒言笑自若至夕密書其裙帶云死後當埋我於段氏墓側遂於浴堂自

縊死

南齊 蔣雋妻黃氏宜興人夫早世矢志不踐二庭家人逼之欲自殺乃已建元二年表其閭

梁 王氏潯陵王整之妹冒母姓姚氏名姚王京年十六歸衛敬瑜敬瑜溺水死王京守志養舅姑嘗有雙燕巢梁間雄爲鷲鳥所傷其雌悲鳴至秋集王京臂如告別王京以紅縷繫足曰新春復來爲吾侶也明年果至如是者五六年王京病卒燕復來家人語曰王京死矣墳在南郭燕遂至墳所亦死雍州刺史晉昌侯操題曰旌義衛氏之門

南陳 楊氏會稽人張彪之妻陳文帝入會稽遣章昭達

領兵購之并圖其妻兵殺彪并其弟首致於昭達文帝遣兵迎楊楊便破涕爲笑給昭達殯彪畢當從命殯事既畢還經彪宅謂昭達曰婦人本在容貌今辛苦日久請暫過宅粧飾楊入屋遂割髮毀面哀哭大慟誓不更行文帝聞之歎息許爲尼終不敢逼

北魏

董景起妻張氏陳留人皇興間景起早亡張時年十六痛夫少喪且無子息遂哀傷過禮終其身不食葷血獨守貞操鄉曲高之終見標異

史映周妻狄氏滎陽人年十七適于映周太和二十三年映周卒狄恐父母奪其志因焚映周遂慟哭嘔血而殯

見者莫不悲嘆屬觀風使以狀上詔表其間

刁思遵妻魯氏萊陽人始笄爲思遵所聘未逾月而思遵  
亡其家憫其少寡許嫁已定魯聞之以死自誓父母不  
達其志遂赴郡訴稱刁氏恠護寡女不使歸寧魯乃與  
老姑徒步詣司徒府自陳狀普泰初有司聞奏詔本司  
依式標榜

張洪和妻劉氏萊陽京縣人年十七夫亡遺腹生一子三  
歲父歿其舅姑年老朝夕奉養兄矜其少寡欲奪嫁之  
劉自誓不許以終其身

後周 鄭善果母崔氏清河人年十三適萊陽鄭誠生善  
果周末誠討尉遲迥力戰而死母年二十而寡父彥睦

隋

欲奪其志毋抱善果曰婦人無再適人之義且鄭君雖死幸有此兒棄兒爲不慈背死夫爲無禮寧當割耳截髮以明素心違禮滅慈非敢聞命後善果爲魯郡太守有過毋蒙被而泣終日不食善果由此克已號爲清吏

永興公主文帝之女始嫁爲周後主后後文帝受禪後主卒仍稱公主欲嫁之公主誓不從而卒

韓觀妻于氏河南人字茂德于氏年十四適于觀年十八觀從軍歿氏哀毀骨立慟感行路父以其幼少無子欲更嫁之女誓無異志截髮自明養夫之孽子世隆爲嗣愛同已生自孀居後惟時或歸寧至於親族之家絕不

往來有尊屬就省謁者送迎皆不出戶庭蔬食布衣不  
聽聲樂以終其身高祖聞而嘉嘆下詔褒美表其門閭  
長安中號爲節婦閭

孫神妻陳氏河北郡人神戌夏州未幾喪亡柩至陳望見  
哀慟一哭而卒文帝詔表其閭

襄城王恪妃者循州刺史柳旦女妃姿貌端麗年十餘以  
良家子召見娉爲妃未幾而恪被廢妃修婦道事之愈  
謹煬帝嗣位復徙邊帝令使者殺之於道恪與辭訣妃  
曰若王死妾誓不獨生恪死棺殯訖遂撫棺號慟自經  
而卒

元務光母盧氏范陽人盛年寡居漢王諒反遣將綦良往

山東略地良以務光爲記室及良敗慈州刺史上官政簿籍務光家見盧氏逼之盧氏以死自誓政凶悍怒甚以燭燒其面盧氏執志彌固竟不屈節而死

裴倫妻柳氏河東人大業末倫爲渭源令爲賊薛舉所陷倫遇害柳氏年四十有二女及兒婦三人皆有美色柳氏謂曰我輩遭逢禍亂汝父已死我自念不能全汝我門風有素義不受辱於群賊我將與汝等同死如何女等垂泣曰唯母所命柳氏遂自投於井其女及婦相繼而下皆死井中

崔氏趙元楷妻清河人隋末宇文文化及反元楷奔至河北將歸長安至滏口遇盜僅以身免崔氏爲賊所拘請必

爲妻崔氏曰我士大夫女爲僕射子妻今日破亡自可  
即死終不爲賊婦群賊裂其衣縛於牀簀之上將陟之  
崔氏懼爲所辱詐之曰今力已屈當受處分賊遂釋之  
崔因取賊刀倚樹而立曰欲殺我任加刀鋸若覓死可  
來相逼賊大怒亂射殺之元楷後得殺妻者支解以祭  
其墓

唐

李德武妻裴氏字淑英安邑公矩之女以孝聞鄉黨德武  
在隋坐事徙嶺南時嫁方踰歲矩表離婚德武謂裴曰  
我無還理君必儷他族于此長別矣各曰願死無他即  
欲割耳自誓保母持不許自是不御薰澤讀列女傳見



述不更嫁者謂人曰不踐二廷婦人之常何異而載之  
書後十年德武未還矩決嫁之斷髮不食矩知不能奪  
臨之德武更娶爾朱氏遇赦還中道聞其完節乃遣後  
妻迎裴復爲夫婦如初

楊三安妻李氏高陵人舅姑及夫相繼卒子孤寡李晝田  
夜紡三年間葬七喪太宗賜帛二百免其徭役

房玄齡妻盧氏清河人玄齡微時病且死謂盧曰吾且死  
君年少不可寡居善事後人盧泣別一目以見志

崔繪妻盧氏鸞臺侍郎獻之女繪喪盧年少家欲嫁之稱  
疾不許女兄適工部侍郎李思冲早亡思冲欲求爲繼  
室歸幣三百舉盧不可曰吾豈再辱于人寧沒身爲婢

耳是夕出自竇糞穢蟻面還崔舍斷髮自誓武后詔爲  
浮屠尼以終

樊會仁母敬氏河東人字象子笄而生會仁夫死事舅姑  
孝順舅姑以其少欲嫁之潛約婚于里人至期陽爲母  
病使歸視敬至知見紿乃佯爲不知者私謂會仁曰舅  
將奪吾志汝云何會仁泣敬曰兒母啼乃伺隙遁去追  
及半道以死自誓乃罷會仁未冠卒敬母亦死樊畢謂  
所親曰母死子亡何生爲不食數日死聞者憐之

樊彥琛妻魏氏江都人魏以彥琛病篤欲殉以死彥琛止  
之及卒值徐敬業亂陷于兵聞魏善音令鼓箏魏即以  
刀斷其指軍中猶愛之魏固拒求死遂見殺

楚王靈龜她上官氏下邳士族靈龜出繼哀王後而舅姑  
在朝夕侍養謹甚靈龜卒將葬議者欲不舉前妃妃曰  
逝者有知寃可無托乃備禮合葬服除兄弟諭以無子  
可不有行妃泣曰丈夫以義婦人以節我未能殉溝壑  
尚可御粉澤祭他祚乎將自刺衆救乃止

王泛妻裴氏永泰中遇賊欲污之罵曰吾衣冠子豈愛生  
受污耶賊臨以兵罵不止乃支解贈河東縣君

李氏二女白之孫也已爲縑民陳雲劉勸妻宣欽觀察使  
范傳正與白有世誼訪得之勸之改適士族二女曰夫  
婦之匹命也在孤窮旣失身下俚伏威力又援締他門  
死何面目見大父于地下傳正不奪其志且爲復其徭

役

王韞秀王忠嗣女忠嗣鎮北京以女歸元載元載少貧歲  
父見輕韞秀勸之遊學肅代兩朝載爲宰相貴盛賓客  
侯門韞秀復爲詩以諫之有公孫開館招佳客知道浮  
雲不久長之句元載不聽被誅上令王氏入宮嘆曰二  
十年太原節度使女十六年宰相妻誰能爲長信昭陽  
之事遂斃于京兆杖下

蘇飛妻陳氏餘干人年十七適飛未幾飛死廬于墓悲苦  
凡三十年親黨莫奪其志永貞間賜旌表

堅貞節婦李者年十七嫁爲鄭肅妻未踰年肅死常布衣  
蔬食夜忽夢一男子求爲妻初不許後數數夢之李自

疑容貌未衰醜所召也即截髮衣麻衣不薰飾垢面塵  
屑自是不復慶刺史白大威欽其操號堅貞節婦表旌  
其門名所居曰節婦里

符鳳妻某氏字玉英貌姝美鳳以罪徙儋至南海爲獠賊  
所殺脅玉英欲私之對曰一婦人不足事衆男子請推  
一長者賊然之乃請更衣有頃盛服立于舟罵曰受賊  
辱不如死自沉于海

王琳妻常者士族也琳爲眉州司功叅軍俗儻侈盛飾常  
不知有簪珥訓二子堅冰有法後皆名聞琳卒時常年  
二十五家欲強嫁之常固拒不聽音樂處一室或終日  
不食卒年七十五著女訓行世

盧惟清妻徐氏淄川人惟清仕校書郎以僚姻累貶播州尉徐還鄉里耦食不御鉛膏采綿會大赦徐聞闕迎惟清至荊州聞惟清死二髯奴將劫徐歸下江徐知之數其罪奴不敢逼劫其貲去徐倍道行至播州足繭流血得惟清尸以喪還閱歲至洛陽葬之以無子終服還陳留汴州刺史徐澣高其節頌而詩之

郭待徵妻薄氏從待徵官河東會袁晁亂薄爲賊所掠將污之不從語家媼使報待徵曰我義不辱即死于水賊去得其尸義聲動江南李華作哀節婦賦

李廷節妻崔氏乾符中廷節爲邠城尉王仙芝攻汝州廷節被執賊見妻姝美將妻之詎曰我士人妻死亡有命

柰何受賊汚賊怒剗其心食之

殷保晦妻封敖孫也名絢字景文能文章草隸保晦歷校書郎黃巢入長安共匿蘭陵里明日保晦逃賊悅封色欲取之固拒賊誘說萬詞不荅賊勃然怒曰從則生不然膏我劒封罵曰我公卿子守正而死猶生也終不屏逆賊手遂遇害保晦歸一慟而絕

張真妻黃氏名帛嬖道人真因過江覆沒帛求夫尸不得于溺所仰而嘆遂自沉積十四日帛尸抱夫尸出灘下慶德公主李氏宣宗女也爲高陵干琮妻琮爲帝保衡貶韶州公主偕之韶州行則肩輿相隨坐則執琮之帶琮由是獲全及琮爲黃巢所殺欲脅公主公主曰我唐室

之女誓與僕射俱死賊并殺之

羅文姬字叔善南昌人年十六適鄭氏疾篤執文姬曰汝  
盛年當別適人姬誓不嫁鄭亡投繯而死

朱延壽妻王氏延壽之妹爲楊行密妻行密狎延壽延壽  
怒陰欲歸唐行密詐執而殺之捕騎至家妻集家人聚  
寶貨焚府舍曰妾誓不以皎然之軀爲讐人所辱遂赴  
火而死

賈直言妻董氏名德真浚儀人直言坐事貶嶺南以妻少  
乃訣曰生死不可期可亟嫁無須也董不答引繩束髮  
封以帛使直言署曰非君手不解直言貶二十年乃還  
署帛宛然及湯沐髮墮無餘



洪勝可妻梅氏夫死于黃巢之亂賊且逼梅梅誓以死白  
馬將軍見而奇之恐卒見污因殺之以全其節

李極妻盧氏美姿容能屬文咸通末極擢進士仕考功郎  
中黃巢亂避地平陽僖宗召爲翰林學士極死盧伏屍  
哭王行瑜兵逼之不從脅以刃斷一臂死

何氏女餘干人年十六爲黃巢所執罵賊不受污遂死之  
惡善鄧氏賅詔妻也南詔主殺其夫欲聘爲妻不從發兵  
嚇之閉城三月食盡盛服端坐而卒

### 五代

魏成妻周氏良鄉民也成年五十乏嗣娶周氏生一子後  
成歿周氏年二十服闋親戚咸勸之再適周氏曰嘗聞

烈女不更二夫妾雖愚婦豈肯更二姓乎于是服勤耕織事姑三十餘年事聞詔旌其門

王凝妻李氏青州人凝爲虢州司戶叅軍卒于官携其幼子負骸骨以歸過開封逆旅主人不納牽其臂出李氏慟曰我不能守節此手爲人所執引斧自斷其臂事聞官爲賜藥而答主人

南唐樂平公主徐知誥女嫁爲江南國主楊璉后知誥受禪復稱公主每涕泣不食曰我爲人冢婦而宗社覆滅何以生爲諸兄皆惡之知誥曰婦人內夫家此宜也後璉卒主相繼亦卒

余洪妻鄭氏建州人查文徽平建州鄭氏爲亂兵所獲文

徽欲犯之鄭氏罵曰王師吊伐九義夫節婦宜旌賞乃  
欲加非禮于一婦人文徽愧求歸之

續文獻通考卷之七十四

皇明進士雲間王圻纂輯

節義考 節婦二

宋

周渭妻莫氏名筌恭城人劉鋹時渭避難奔走不暇與筌訣二子孩幼筌尚年少父母欲嫁之筌泣誓曰渭必能自奮于是親蚕績碓春以給朝夕二子皆婚娶凡二十六年太平興國初渭復歸人皆異之

劉氏建安曹觀之妻皇祐五年觀守封州儂智高陷郡死之劉逃難林垌中知觀死亦自經曰吾不可污于賊事聞追封彭城縣君加贈冠帔

張氏江夏民婦里惡少謝師乞過其家持刀逼欲污之張大罵曰庸奴可死不可辱也師乞以刀斷其喉未即死猶能擒師乞告隣人遂死嘉祐中封旌德縣君表墓曰烈女賜酒帛令郡縣歲時致奠

趙節婦達州人嫠居有覓人欲犯之脅以白刃終不屈旣而誘以百端終不可遂刺殺之皇祐二年知州薛侔爲立碑于州之西北山上後邑令薛仲侃創祠祀焉

趙氏貝州人賊王則反聞趙有殊色劫欲爲妻趙以計脫歸使賊禮迎至期恐不行則賊將屠其家乃登輿自維而死

永泰縣主太祖從孫女性孝敬年十四歸元班殿直桑子

才克執婦道事舅姑孝謹夫亡時永泰年二十二哀毀  
幾隕諸族欲奪志永泰以節自誓終身不渝初封共康  
郡君元豐中加今封以褒榮之

包纒妻崔氏纒早亡惟一幼兒姑意崔不能守使人試其  
心崔蓬垢涕泣曰生爲包婦死爲包鬼誓無他也後兒  
亦卒母呂誘崔嫁崔曰舅歿姑老將安之乎呂怒崔泣  
曰倘以不義見迫必絕于尺組之下母乃止卒于包氏  
事聞旌表纒極之子也

吳白妻徐氏餘干人年十九白將死喻之曰幸念爾子善  
事後人徐剗目以示白建中靖國間旌表門閭

姚三五妻程小姑大邑人一日姚如外小姑筑然獨居夜

漏半強奴挾刃逼之號呼義不受辱身被重創者十四  
訖全大節縣上其事論奴如律大觀中封旌德縣君  
張廷榮妻王氏壽光人宣和間賊邢貞執其翁王以金帛  
贖之又欲逼其從王怒罵不止遂見殺時年二十詔旌  
其門廷榮後歸金中進士

孫節婦項氏吉水人宣和間夫以逋出走項爲里胥執送  
官至中途欲犯之項即引刀自刺郡以聞詔旌其廬  
王氏睢陽人適宗室趙子一一亡王氏誓不嫁靖康之變  
避地鎮江亂兵陷城王氏用堊土自毀負其姑秀容縣  
君以逃且襁携幼子他子引其裾纍然轉徙亂戶間越  
四年始達溫陵移居莆田終焉一時名人如陳俊卿輩

皆有詩哀之

張晉卿妻丁氏新鄭人靖康中與夫避金兵爲所獲挾之馬上丁自投于地戟手大罵連呼曰我死即死誓不受辱復挾上馬再三罵不已卒忿然舉挺縱擊死杖下

王氏二婦汝州人建炎初金人至汝二婦爲所掠置之舟中二婦乘間遂投漢江而死尸皆浮出不壞時人收葬城外江上爲雙塚以表之

向氏長陽人建炎中保山寨以避寇賊皮仲破寨向義不辱被殺人見其白乳自吮流踵向之子後誘賊醉而殺之以復母仇

南劍州小常村婦人失其姓氏建炎四年五月楊勛叛卒



由建安寇延平道出小常村掠婦逼脅欲犯之婦毅然  
誓死不受污遂遇害橫屍道傍賊退人爲收瘞之而其  
屍枕藉處迹隱然不滅每雨則其迹乾晴即濕宛如人  
影往來莫不嗟異鄉人或削去之隨即復見覆以他土  
而其迹愈明

葉氏長汀人歸爲石城賴仲元妻事舅姑無間言仲元遊  
嶺表未還建炎中盜起寧化直抵石城葉以夫旅遊舅  
姑年邁勢不能遁委命以待俄寇至閭里婦女悉驅迫  
棄家葉極口罵賊以身自觸白刃寇怒斷其喉舌子女  
皆遇害

師氏彭州永豐人適范世雍子孝純建炎初還蜀至唐州

爲賊朱顯忠所掠孝純先被害欲污師氏師氏大罵不屈遇害

馬元穎妻榮氏儀真人元穎爲將作監薄建炎兵亂榮氏奉姑携子以逃爲賊所劫以兵脅之不從賊怒傷其姑榮氏叱之又殺其子榮氏自刃其臂罵賊不已遂殺之王宣妻曹氏臨淮人建炎中盜馬進掠臨淮宣要曹氏同避曹曰吾聞婦人死不出閨門賊至遂赴刃而死

鍾離婦紹興間金人攻陷濠城欲驅之去婦曰吾良人子從汝賊耶金人怒斷其臂婦罵不絕而死

梁氏龍泉人適同邑李生盜彭友犯吉州梁義不受辱赴

水死

黎婦管氏寧都人紹興間李寇破縣欲污之管不從罵賊  
被殺

黃淑字致柔建寧進士王防妻防爲泗洲戶曹卒黃挈柩  
歸未幾母又卒所新議改適廬陵令黃誓不改節詠竹  
詩以見志議遂寢後憂鬱死臨終囑其妻以詩置其中  
廖氏新喻人貢士歐陽希文妻紹興間建昌白鵲竝盜過  
臨江廖以身蔽姑使希文負之逃廖爲賊所執正色叱  
之至斷其耳與鼻猶罵賊遂遇害淳熙間郡守以聞勅  
封護其墓

羅愛卿年十八適趙氏子趙入京求仕因亂爲劉萬戶所  
虜誓不屈自縊而死

吳氏建陽人兵部尚書呂祉之妻累封淑人社爲鄺瓊所  
害有得祉括髮之帛歸吳中者吳氏持帛自縊以殉葬  
吳永年妻何氏金兵陷平江執何氏及永年姊何紹之曰  
婦人東西惟命何繫爲賊信之不爲備行次水濱何投  
于河姊繼之陳長方爲作二烈婦傳

張弼妻徐氏名觀和州人建炎三年金兵犯邑官軍奔潰  
肆掠執徐欲污之徐瞑目大罵賊刺殺之投于江

譚氏英州真陽縣人曲江村士人吳琪妻也紹興五年爲  
觀音山盜所執欲妻之譚怒罵不屈被害同時有南雄  
李科妻謝氏囚于虔盜中數日有欲犯之者嚙其面曰  
寧萬段不汝徇盜殺之

涂端友妻陳氏臨川人紹興九年盜驅入黃山寺逼以刃大罵不屈乃幽之屋壁數日族黨有得釋者咸齎金帛以贖其孥賊引端友妻令歸曰吾聞貞女不出閨閣今吾被驅至此何面目復登涂氏堂復罵賊不絕竟死之劉生妻歐陽氏安福人紹興十年生以事出惡少欲侵之不受辱而死

劉氏海州朐山人適同里陳公緒紹興末公緒挈其子歸宋劉時歸寧倉卒不得與偕獨居二十五年緯蕭自給公緒音問不通或勸其改適終不從後子寢長思母奔走淮甸遂得迎母以歸

常豐婦張氏嘉定中爲寇蔡六所掠罵賊不屈遇害帥魏

公嘉其節以禮具葬題其墓曰節婦張氏之墓

龔自立妻張氏樂昌人嘉定中寇至夫妻襁負二稚竄匿  
爲賊所得脅以行張與夫訣曰妾死無憾所憐者二子  
幸善撫之中道詣賊曰吾渴欲飲可暫解我縛賊從之  
遂投江中邑人立祠祀之

廖氏沙縣人性慧解歌舞紹定三年爲賊所掠命之歌舞  
廖罵曰我恨不礮汝寧肯悅汝耶賊怒殺之時賊欲窺  
城廖有娠賊剗其腹觀男女以卜進退得女遂引去招  
捕使陳韓以聞詔贈懿節夫人立廟祀之

林氏龍溪人年十九嫁爲謝氏婦踰年而寡父母以其無  
子欲奪而嫁之誓不許曰吾立一嗣亦無不可守志六

十餘年嘉熙間縣令趙絳夫爲立碑于墓郡守李韶著  
曰守節婦林氏墓

王友筠妻李氏句容人年二十一而友筠卒有子方在襁  
褓父母欲奪其志李泣曰夫不幸死尚有子使我又棄  
其子乎因剪髮自誓淳祐間詔旌其門

吳世靜妻涂氏進賢人夫早卒止有一女勵志守節淳祐  
中北兵遊騎至章江涂氏撫其女曰世亂如此無辱身  
相携赴水死

王德甫妻余氏德甫以訟喪家令余改適余卒不行咸淳  
中危順吉即其里立節婦坊與以粟帛

羅李二氏保昌人宋末賊掠其村二婦義不受辱投水而

死

李氏樂安人適邑西楊氏德祐間元兵至爲賊所獲逼之  
李抗罵而死

譚氏婦趙氏永新人元兵破城趙氏抱兒匿鄉校禮殿中  
爲悍卒所獲欲污之不從臨以刃曰吾與不義而生寧  
死從吾舅姑耳遂與嬰兒同遇害血漬禮殿入磚上宛  
如婦抱嬰兒狀或磨之其狀益顯詔即學內立廟祀之  
朱氏莆田人通判興化軍陳用虎妻也封安人元兵寇閩  
用虎之兄文龍知軍事發兵固守及元執文龍以去朱  
氏遂自經死

饒氏寧國人年二十一適宣城吳寶信嫁甫七日元兵犯



浙寶信從張世傑等奉廣王益王浮海死饒氏守節無他志

謝枋得妻李氏安仁人元購捕枋得急拘李于獄時總兵欲妻之李解裙帶縊死有一女亦死

臨海民婦王氏美姿容伯顏師至被掠千夫長殺其舅姑與夫而欲私之婦誓死不可令俘婦堅守之因陽曰能裨我舅姑與夫乃可事主君千夫長從所請王送葬畢至嶼上清風嶺仰天竊嘆曰吾知所以死矣即齒拇指出血寫口占詩于崖石上曰君王無道妾當災棄女拋男逐馬來夫面不知何日見此身料得幾時回兩行清淚偷頻滴一片愁眉鎖未開回首故山看漸遠存亡

兩字實哀哉寫畢即投崖下以死血滲入石間將陰即墳起如始書時不爲風雨剝蝕曠丞徐君端樹石刻碑于死所浙東元帥秦野不華守越日爲立廟像鄉之人私表曰貞婦易嶺名曰清風

韓希孟岳州人開慶己未北兵破州爲游卒所掠以獻主將韓知不免乘間赴水死時年十八越三日有得其屍于練裙中題五言長句曰宋未有天下堅正臣禮秉開國百戰功每陣惟雄整及待周幼主臣心常炯炯帝曰卿北伐山戎今有警死狗莫擊尾此行當繫頸即日辭陛下盡敵心欲逞陳橋忽兵變不得守箕穎禪讓法堯舜民物普安靜有國三十年仁義道馳騁未改祖宗法

天胡肆大青細思天地理中有幸不幸天果喪中原大  
似裂冠衽君誠不獨活臣實無魏丙失人焉得人垂戒  
當耿耿江南無謝安塞北有王猛所以戎馬來飛渡江  
陵境大江限南北今此一舸艤本期固封疆誰謂如畫  
餅裂火燒崑岡不辨金玉礦妻本良家子性僻守孤梗  
嫁與尚書兒御署繁檄省直以才德合不棄宿瘤癭初  
結合歡帶誓比日月炳鴛鴦會雙飛比目願常並豈期  
金石堅化作桑榆景梵頭勢正燃虫尤氣未屏不意風  
馬牛復及此燕郢一方遭劫虜六族死俄頃退鷁落迅  
風孤鷺吊空影簪堅折白玉瓶沉斷青綆一死空冥府  
憂心常炳炳意堅志不移改邑不改井我本瑚璉器安

肯作溺血志節匪轉石氣噎如吞鯁不作燭火燃願爲  
死灰冷貪生念麴蛾乞憐羞虎穿借此清江水葬我全  
首領皇天如有知定作血面請願魂化精衛填海使成  
嶺韓名希孟年十有八魏公五世孫襄陽賈尚書子瓊  
之婦

王氏婦梁臨川人歸夫家纔數月元兵至與夫約曰吾遇  
兵必死若後娶當告我頃之夫婦被執有軍千戶強使  
從已婦紿曰夫在此不忍乞歸之而後可千戶以所得  
金帛遺其夫而歸之約行十餘里千戶即逼之婦拒且  
罵被殺數年夫以無嗣謀再娶議輒不諧因告其故妻  
夜夢妻曰我死後生某氏家今十歲矣後七年當復爲

君婦明日遣人聘之一言而合詢其生與婦死年月同云

劉全子妻林氏福清人全子以福建招撫使起義兵敗自經死有司執其妻具反狀林大罵曰劉林二族世爲宋臣欲以忠義報國何爲反乎吾死且求治汝于地下遂遇害

岳州徐君寶妻某氏被虜來杭居韓蘄王府自岳至杭相從數千里主者數欲犯之而終以巧計脫蓋某氏有令姿主者弗忍殺之也一日主者怒甚將即強焉因告曰俟妾祭謝先夫然後乃爲君婦不遲也奚用怒哉主者喜諾即焚香再拜默祝南向飲泣題滿庭芳一詞于壁

上已投大池中其詞曰漢上繁華江南人物尚遺宣政  
風流綠窓朱戶十里爛銀鈎一旦刀兵齊舉旌旗擁百  
萬貔貅長驅入歌樓舞榭風捲落花愁清平三百載典  
章文物掃地都休幸此身未北猶客南州破鑑徐郎何  
在空惆悵相見無由從今後斷魂千里夜夜岳陽樓

王氏龍溪人蘇宋傑妻年二十一而寡方娠夫家貧父母  
欲奪其志誓不許父母怒絕其往來既生男父母意猶  
未解不得歸寧者七年及男既長則曰吾今不復強汝  
嫁矣愛如初

侯氏南豐人謝泌妻家貧事姑孝盜起侍姑不去盜逼之  
不從刃之不死遂得生仆溝中賊退漸甦見一金珠篋

族婦以爲已物稍分之辭曰非我有不願也後夫與姑俱亡子幼父母欲改嫁侯曰寧餓死耳卒終其節

李氏歸劉汝霖生子安雅未及百日夫李誓不負所天一節終身

黃氏建寧人適同邑進士王防防爲泗州戶曹卒黃營挈其柩以歸哀毀骨立服闕所親議改適黃憤鬱悲號不食死

葉氏慈谿人歸鄞之史簡簡爲縣尉杖死葉氏時年二十五日夜抱幼女悲泣夫死時方娠囑曰若生女當嫁果男也幸謹視之葉氏泣受遺言後果得子於是毅然自守隣保咸謂汝家若是祿中兒寧可恃耶葉氏誓死不

聽

張氏名妙靜慈谿人年十九歸本邑李基甫入門夫已病  
革一顧而易箆或云伉儷未成盍返而從其父母張氏  
誓不許曰入李氏之門即李氏之婦義不再適守節終  
身年八十四卒

張氏婺源人許某妻也年二十餘夫死遺腹生一子明年  
姑與子俱死夫族盡撫其家而有之乃還母家鬻簪珥  
自營一室奉許氏祀婺居二十三年而歿

吳中孚妻某氏進賢人少寡景定元年兵亂携孤女自沉  
于縣之染步曰義不負吾夫

楊氏知欽廉州友之女適蔡若訥喜讀書通大義夫卒時



年二十有三守節不二書乞爲寒水王願作冷秋孤二  
句于壁以自勵

黃氏名桃娘德化士族女美姿色早喪父年十六適同里  
陳德環期年夫以役死于外計至痛哭絕而復蘇亟尋  
夫屍歸葬母憐其少無子每迫之嫁黃知不免一日假  
以澣衣于門前溪側遂投水死

王氏奉化人年十九歸廣平舒立三月而夫亡後媒妁踵  
至王氏答曰雖父母有命我志不可奪也守節終其身  
年八十八卒叅政樓鑰立石于塚上題曰宋節婦王氏  
之墓

胥氏金谿人嫁黃君雋未期而寡父問所志答曰生爲忠

孝家婦死爲忠孝家鬼蓋以雋爲忠孝黃彥遠之裔也  
朱氏開封民婦夫日與俠少飲博犯法徙武昌父母欲奪  
而嫁之朱曰何迫我如是耶其夫將行一夕朱自經死  
且曰及吾夫未去使知我不爲不義屈也

金氏高淳人少寡居貧甚里有惡少欲污之持刃逼脅余  
曰決無從汝之理可即殺我遂見害有司以事聞表其  
市曰節婦里

鄭臘兒妻康氏曹州人夫早卒康以死從之旌曰貞節  
徐順妻彭氏東平人夫早卒彭尚艾竟以死殉詔旌其閭  
夏氏德興人余應琦妻年十九應琦卒無子立嗣以守後  
旌表其門曰節義

張旨妻李氏河內人旨遊學數年不返家人欲嫁李竟守節而死表其坊曰節婦

程起宗妻吳氏休寧人嫁再期而舅與夫皆歿以夫族子爲後強族利其貲欲改立嗣訟之不得乃迫置一室困之使不能存吳不爲動未幾所立子亦卒僅一孫相依爲命年八十有二而終

王粉兒汝州人許嫁同里張得山未行而得山死粉兒即柩旁慟哭幾絕既葬復至墓所奠哭遂自縊青楊樹下北辰烈婦某氏楚州淮安人有美色夫爲小商載之同行隨至北辰夫病死貧無以殮同舟富商假貨爲喪費自恃有恩顧其妻以爲已物烈婦既葬之三日復慕以歸

見勢且迫遂取其嬰兒縛置胸號哭赴淮而死徐積嘗  
記其事作詩哀之曰海水猶可泛君身不可犯淮水猶  
可瀦君身不可污鸞鳳猶可馴君身不可親不是雲間  
月便是月邊雲

陳節婦臨海人貢士朱伯履妻年少夫亡有欲奪其志者  
陳氏撫膺慟絕旣甦嘆曰吾寧速死忍聞此言引刀欲  
自剄姑亟奪之乃免事父母舅姑至孝詔封安人旌其  
門

梁氏臨川人歸王氏纔數月會元兵至夫婦俱被掠有千  
戶強使婦從已婦紿歸其夫而後可千戶從之約夫行  
遠即拒罵而死

遼

耶律奴妻蕭氏小字辛國舅駙馬都尉陶蘇幹之女美姿容年二十始事奴睦族以孝謹聞奴被乙辛誣流烏古部上以辛公主之女欲使絕婚辛辭曰陛下以妾葭莩之親使免流竄實天地之恩然夫婦之義生死以之妾自笄年適奴一旦臨難頓自乖離與禽獸何異幸陛下哀憐與奴俱行妾即死無恨帝感其言從之後舉家召還保大中命諸子避賊辛死之

耶律朮者妻蕭氏國舅孛謹之女性端慤有容色年十八歸朮者謹恪貞婉娈似推重及居朮者喪謂所親曰夫婦之道如陰陽表裏無陽則陰不能立無表則裏無所

附木者早歲登朝有才不壽儻死者可見則從不可見則當與俱自刃而卒

耶律中妻蕭氏小字接蘭年二十歸中事夫敬順天慶中爲賊所執置刃於頸以死自誓賊遁而免中拜五院都監金兵逼城中謂妻曰吾當以死報國汝能從我乎接蘭對曰謹奉教後中死接蘭無感容俄躍馬突至中所自殺

金

王氏安陽人進士郭丙妻也海陵王南遷丙避亂居杞及元兵渡河夫婦相失王暨少女俱被掠泣謂女曰今夕不死必被辱矣吾勢不能顧汝守者少緩遂投河死

劉氏蒲城人許古妻貞祐初賊圍蒲急劉恐見驅爲所污  
與二女相繼自盡貞祐四年五月追封劉氏爲郡君謚  
曰貞潔長女謚曰定姜次曰肅姜以其事付史館  
相琪妻樂氏貞祐問繩襖賊陷掖樂夫婦及子皆被執殺  
琪與子而欲不之樂大罵不從賊怒殺之追封西河縣  
君謚曰莊潔

烏古論氏臨洮總管陀滿胡土門之妻崔立之變衣冠家  
婦女多爲所污烏古論氏自縊死

李伯通妻周氏石城人元兵之亂爲所獲謂同行者曰人  
雖愛其生萬一受辱不如死即自投于塹幸不死績維  
自給教其子易讀書有成

李英妻張氏英爲監察御史元兵破濰欲取爲夫人不從  
遂見殺追封隴西郡夫人謚莊潔

翟節婦易州人金末年二十餘夫從年死翟出入兵刃往  
復數百里晝伏夜行以其尸歸負土而葬之旣葬又自  
以無子遭時亂思以義自完乃自決于墓側鄰里救而  
復蘇始終一節年八十卒

康氏鄜州人夫早亡服闋父取之歸家許嚴沂爲妻康氏  
誓死弗聽投崖而死事聞命有司祭其墓

史氏白水縣人李文妻夫亡誓不更嫁父強以許邑人姚  
乙史不聽姚訴之官被逼迫自縊死詔有司旌其墓

蒲氏行唐人嫁樊氏爲妻未幾樊卒誓不再適時有山寇



逼求爲妻蒲氏跳于崖下水中而死鄉人號曰義姜稱其水爲王女塘

續文獻通考卷之七十四終